

河防一覽目錄

卷之一

祖陵圖說

皇陵圖說

兩河全圖說

卷之二

河議辯惑

卷之三

河防險要

卷之四

修守事宜

卷之五

河源河決考

卷之六

泗州先春亭記

賈魯河記

河源記

于都憲題名記畧

鑿徐洪記

鑿呂梁洪記

奈太常全河說

止泃河疏

止膠河疏

卷之七

經畧兩河疏

部覆前疏

河工事宜疏

部覆前疏

勘估工程疏

部覆前疏

卷之八

恭報續議工程疏

查復舊規疏

部覆前疏

申明鮮貢船隻疏

部覆前疏

報塞黃浦疏

河工告成疏

黃河來流艱阻疏

申飭徐北要害疏

卷之九

覆議善後疏

覆議河工補益疏

高堰請勘疏

計議淮南未盡事宜疏

申飭鎮口閘禁疏

部覆前疏

卷之十

河工分派司道疏

部覆前疏

議留河工米銀疏

部覆前疏

申明修守事宜疏

部覆前疏

議守輔郡長隄疏

部覆前疏

恭誦綸音

部覆前疏

卷之十一

添設管河官員疏

申明河南修守疏

停寢訾家營工疏

部覆前疏

修復湖隄疏

就近銓補分司疏

就近銓補河官疏

查議通濟閘疏

部覆前疏

河工告成疏

贈卹司官疏

卷之十二

甄別司道疏

部覆前疏

申明鮮船疏

部覆前疏

申明職掌疏

部覆前疏

縣官輕忽河務疏

旱久泉微禱雨疏

添募夫役以裕河工疏

官旗挾帶私貨疏

部覆前疏

恭報三省直隄防告成疏

河上易惑浮言疏

畫地巡守疏

申明修守泗隄工完疏

議創石隄疏

會勘徐城鎮口疏

工部覆前疏

報消泗水疏

併勘河情疏

卷之十三

請遣大臣治河疏

科道會勘河工疏

科道進圖說

條陳善後事宜疏

條陳河工補益疏

條陳治安疏

中州河防要害疏

部覆前疏

卷之十四

查理沁衛二河疏

河工大舉疏

欽奉查理河漕疏

南直隸工程

酌議河道善後疏

祖陵當護疏

欽奉查理河漕疏

山東工程

清復湖地疏

目錄

一覽卷之十

河臣潘季馴著

南甌分司主事王元命
濟寧兵河副使曹時聘

校訂

運同陳鳳

奏疏

河工分派司道疏

臣潘季馴謹

題爲檢查節奉

欽依河工分派司道各官以便責成以圖早竣事臣
於本年六月初二日到任隨行各司道查理
勘督河工工科都給事中常居敬先後具

題河上事宜除申飭禁例查覆賢否等項及議應
停寢者已經遵行外其應修應築工程逐一
開報前來隨准漕撫戶部右侍郎舒應龍揭
帖內一件爲欽奉

竊論查理河漕以保運道事內有添建鎮口閘接築
塔山支河縷隄議修清江浦隄外草壩初築
寶應縣西土隄石砌邵伯湖隄疏濬裏河淤
淺等事一件爲酌議河道善後事宜以裨運
務以圖永利事內有添設柳浦灣料廠一事

其在淮揚所應興舉者如此矣。續該臣准工部咨爲查理河漕以重

國計事內有查復南旺馬踏獨山馬場四湖建築坎河滾水壩添建通濟永通二閘等事又准工部咨爲清復湖地以濟運道事內有查復安山湖地一事其在山東所應興舉者如此矣。臣隨自淮揚歷邳徐至山東沿河一帶地方逐一查閱前項工程委於運道大有裨益相應作速興舉勒限告成但道里寥遠工程

浩大而中如修復五湖內皆有復斗門築堤隄建淡水壩等工尤爲煩瑣若非分任責成或易摧護除建鎮口閘塔山支河縷隄修清江浦外隄草壩添設柳浦灣料廠先該漕憲右侍郎舒應龍行委南河郎中羅用敬中選郎中沈修夏鎮主事楊信徐州兵備道僉憲陳文燧督同淮安府管河同知徐伸姜桂芳徐州判官鄭簡等見在興舉已有次第至如舊督行各官上緊築砌外其興築寶應縣西

七隄二十里石砌邵伯湖隄二十里疏濬淮
安至儀真一帶裏河淤淺查係南河郎中羅
用敬海防道副使周夢暘地方三工俱當以
中爲界北段屬之羅用敬南段屬之周夢暘
查復馬踏湖添建梭隄集永通閘則委之北
河郎中吳之龍而應築土隄修復王巖口滾
水石壩俱以屬之該司矣查復蜀山湖建築
坎河壩則委之南旺分司主事蕭雍而築隄
束水修復滾水大壩俱以屬之該司矣查復

馬場湖添建火頭灣通濟閘則屬之濟寧管
河道按察使曹子朝而封界子隄一道安居
斗門三座俱以屬之該道矣查復南旺湖地
則委之東兗道左叅政郝維喬而修復邢通
等口一十二處張任口斗門一座封界子隄
一道中亘長隄一十四里俱以屬之該道矣
查復安山湖則委之曹濮道僉事劉宏道而
封界子隄朔建八里灣似蛇溝二閘俱以屬
之該道矣至於管河同知通判及州縣掌印

管河等官隨其地之所屬聽各該司道徑目
分委如有不足不妨選取別郡賢能者而用
之也至於關提夫匠查取物料司道有不免
於互相資藉者又當通融幫助以普同心共
濟之義不待臣丁寧告誡之矣既經分派停
當恭候奉有

明旨之後各官一面鳩工庀材水落舉事定限明春
三月內完工以慰

聖主南顧之懷以圖運道永賴之利毋得失時廢事

致有墮誤中間斗門隄壩等項瑣屑事宜或於原議稍有參差如先遠而今宜稍近先近而今宜稍遠先多而今宜稍減先無而今宜添設大同而小異者不妨相度地形臨時擬議以憑裁酌臣同各該撫按及巡鹽御史不時查閱工完之日容臣分別勤惰疏名上

請恭候

聖裁伏望

敕下該部再加查議如臣所言不認擬議覆

謹行臣遵奉施行庶事體不淆而責成自易人心競奮而告竣可期矣謹題請

旨奉

聖旨工部知道

工部覆前疏

題爲檢查節奉

欽依河工分派司道各官以便責成以圖早竣事該總理河道右都御史潘季馴題前事等因奉聖旨工部知道欽此欽遵抄出到部送司案查萬歷

十六年四月內該查勘督理河工工科都給
事中常居敬總督漕運戶部右侍郎舒應龍
各題爲欽奉

欽諭查理河漕以保運道事內條議古洪閘以外添
建鎮口閘座并接築塔山支河縷隄等項本
月內又該查勘河工都給事中常居敬題爲
酌議河道善後事宜以裨運務以圖永利事
內條議申飭閘規并添設柳浦灣料廠五月
內又該查勘河工都給事中常居敬巡撫山

東右副都御史李戴各題爲欽奉

敕諭查理漕河以重

國計事內條議查復湖地積水濟運并建築坎河
滾水壩各緣由俱經本部覆奉

欽依備行各該撫按及總理河道等衙門轉行管河
司道一體欽遵訖今該前因相應具題案呈
到部看得山東至淮揚一帶河道應修應築
處所地里寥遠工程浩大提綱挈領雖在總
理大臣而畫地効勞必須度司分任所據河

道都御史潘季馴題稱將各處工程量其地
之遠近險易分委各該司道等官管理區處
當而勞逸適均任使宜而責成尤易俱應如
議題請恭候

命下本部備咨總理河道并鳳陽山東各巡撫衙門
一體遵照施行及行管理河道泉源閘壩郎
中主事管河守巡各道查照分地督率府州
縣管工官員竭力修治本部仍咨都察院轉
行各該巡按巡鹽御史各照所轄地方不時

稽察工程期于同心共濟備興工前後或有
事體與原議稍異者卽便從宜處置或有原
議未盡者不妨另行增補悉如原題定限十
七年三月終通完其總河大臣仍親自查閱
委果工程堅固足保無虞從實

奏報於內一有推諉誤事卽時叅處工完之日將
做過工程錢糧夫役等項造冊

奏繳清冊送部備查其效勞大小官員分別勤惰

題

請以俟賞罰伏候

聖明裁定敕下臣等遵奉施行奉

聖旨是河道工程着司道等官各照分定地方用心
管理上緊完報不許疎玩

議留河工米銀疏

臣潘季馴謹

題爲查議河工緊急工費以免臨期匱乏事據管
理南河工部都水司郎中羅用敬管理中河
工部都水司郎中沈修整飭淮揚海防兵備

道副使胥遇整飭徐州等處兵備道僉事陳
文燧會呈先蒙總督漕運提督軍務巡撫鳳
陽等處地方戶部右侍郎兼都察院右僉都
御史舒應龍信牌前事照得

國家歲漕轉輸必資河運而河防歲修築隄疏淺
工費不貲額編錢糧十無二三每每那移曲
處至今既竭已甚誠爲無米之炊夫

國家治河濟運事干河南山東直隸三省直地方
然山東運河甚安河南有黃河而無運河直

河防一覽 卷十
隸則自徐至淮五百里以黃河爲運河自淮
至揚四百里以重湖爲運河防守要害緩急
迥不相同今在山東河南則供以全省之力
在直隸則僅取足於四郡積災之民惟於工
費不敷歲多修築未堅無惟其歲圯而淤決
之患終不免也見蒙

聖上軫念河漕大計

特遣工科親詣督勘必欲爲河漕久遠永利之策工
費錢糧卽爲首務備仰司道會同卽查過淮

漕糧三六二六輕齋銀內例復二升河工米折銀一分後以通惠河成改解太倉濟邊見今九邊款貢餉邊年例頓減於舊如以河工之銀仍充河工之用本係正徵正支似爲經久可恃再查萬曆元年瓜州閘座建成南京江北各衛軍船直達水次省免浙江杭嘉湖直隸蘇松常鎮等府顧覓江船七升米銀已經前任總理河道侍郎萬恭議題量復一升折銀備修江南河道其餘陸升免徵於民卽

今應否於內再復數升以充修河之費逐一
會查的確作速呈詳以憑酌議施行蒙此行
間又蒙本院信牌爲查議河道錢糧事照得
淮揚濱河一帶隄岸係干運道噤喉歲修工
程方殷需用錢糧甚急况兼工科都給事中
常居敬題奉

欽依應築邵伯湖石隄一道計二十里該銀二萬二
千九十七兩朔築寶應西隄一道計二十里

該銀四千一百三十一兩亟宜興舉應用錢

糧俱合查議仰司道會行淮安府卽查原議
歲修銀三萬兩自萬歷九年起到十五年止
某年某處用過若干尚存若干有無拖欠作
何催補各工有無足用及近議邵伯寶應土
石二工錢糧作何區畫俱要明白聲說從長
計議如有別項堪動錢糧就便斟酌停妥會
呈前來通詳漕撫衙門以憑覆覈會

題等因蒙此當該司道會行淮安府查勘去後隨
據該府回稱卷查萬歷八年十一月內蒙本

院題奉

欽依歲修銀三萬兩內該鹽運司帶徵鹽引銀一萬
八千兩河南協濟銀九千兩淮揚兩鈔關并
徐州戶部稅銀三千兩每年徵解淮庫專備
各工支用後因十四年鹽滯商困該司奉文
蠲免四千五百兩三鈔關稅銀期滿仍解戶
部隨該司道會議將山東河夫銀四千五百
兩并撥瓜儀盤壩脚米銀徐屬派剩麥銀係
原議解給徐呂二洪靈璧等處夫銀之數共

二千陸百餘兩抵補前額呈蒙題奉

欽依在卷近又該山東撫

崔原議河夫銀兩仍留彼處募夫挑濟其在河南九千兩除節年拖欠一萬三千餘兩外又以去年歲衝決異常該前任總督漕撫侍郎楊一魁具

題停免議將漕糧輕齎三陸二六漕米二升河工銀留淮支用該部議覆止將十六年分數內量留九千兩抵作河南應解之數以後年分

該省照舊徵解准庫等因欽遵外今查自萬
歷九年起到十五年止各處解到銀兩盈縮
不一節經奉文支盡除將收支細數另行冊
報外尚有借用未補應給未支江都高寶山
陽清河等處工銀實該一萬七千九百六十
四兩八錢二分零徐呂洪夫工食額於瓜儀
二壩各衛所挑盤脚米銀內扣存一千五百
七十八兩比因去年各處災傷減存漕船數
多止扣有脚米銀六百一十三兩三錢八釐

零其餘九百六十四兩六錢九分零尚無扣
補徐屬欠解原派剩麥銀一千五十九兩卽
今高寶江都山陽清河一帶喫緊工程俱因
前銀不敷止領一半各該有司仰體

朝廷運道爲重東邵西借朝給暮空終非常策且
伏秋修守之候臨時支用不常又不知約用
幾何查得江南雇覓江般米免徵七升續雖
議復一升而六升仍蠲在民也相應於六升
之內再復二升該糧一萬一千三百七十七

石九斗七升六合八勺八抄折銀五千六百
八十八兩九錢八分八釐四毫四絲輕齋扣
米二升折銀一分近雖解濟邊餉而其始乃
修河故物也相應於內歸還河工一升該糧
二萬七千五百石折銀一萬三千七百五十
兩通共該銀一萬九千四百三十八兩九錢
八分八釐四毫四絲與同舊額見該徵解實
銀通收淮庫作歲修支用等因呈報前來據
此又該司道會同覆覈無異况去年雨水異

常今歲工程倍於往昔其所估者過其數於
原額之外其所收者減其數於原額之中那
借者無從查補見在者何憑支給各工遑遑
誠猶捧漏卮沃焦釜莫知其所措者今據該
府所議前項江南雇船米一升外再復二升
并於輕齋二升米銀內歸復河道一升俱係
河工正額錢糧向因邊防告急河道無虞故
暫爲借處以濟邊也今外藩欵貢河道多艱
原額錢糧委應歸復伏乞早爲題

請以濟工程又查得近該工科都給事中常居敬題
築邵伯湖石隄二十里該銀二萬二千九十
七兩寶應西土隄二十里該銀四千一百三
十一兩皆係

要工程向因所議錢糧原未註有定項迄今
尚未興舉乞查別項堪動錢糧一併題

應用以便早竣等因會呈到臣據此該臣會
同總督漕運提督軍務巡撫鳳陽等處地方

戶部右侍郎兼都察院右僉都御史舒應龍

議照運道之設專爲歲漕歲漕之遲速係運道之通阻其休戚常相關也若徒求速于歲漕而不先求通于運道徒求通于運道而不先求務乎歲修徒求務乎歲修而不先求裕于工費皆非知務者矣我

國家歲漕四百餘萬皆由瓜儀入閘以至通惠河綿亘三千餘里山東濟寧州以北原無衝溢之苦疏濬歲有常規額辦足資工料姑置勿論矣惟是淮南則多諸湖之險淮北則有黃

河之患波濤之衝刷隄岸之坍塌無歲無之
故歲修之錢糧亦無歲可缺者先該臣于萬
歷八年十一月內會同漕撫衙門題

請河道歲修銀三萬兩今查數內鹽運司帶徵鹽引
銀已蠲四千五百兩復還戶部三廠稅銀三
千兩尋改山東徐呂靈璧河夫銀未期而山
東撫按復議留彼處挑濬難以解銀而徐呂
靈璧河夫銀又多缺少且彼處工程頗多夫

役亦似不可少者河南歲該解銀九千兩節

年拖欠一萬三千兩又以去歲衝決異常十
六年議停徵矣是原

題三萬之數僅存鹽引銀一萬三千五百兩耳及
查該司道所報今歲歲修銀已費四萬一千
四百八十兩有奇是所出之數浮於所入之
額已三倍矣目前似已不支他日必至債事
誠不可不預爲之計者又該都給事中常居
敬題奉

欽依議築寶應縣西土隄二十里束水刷沙俾無膠

淺之患江都縣議砌邵伯隄石工二十里捍
湖衝激俾無傾潰之虞皆係喫緊工程共該
工料銀二萬六千二百二十八兩原未議有
動支何項錢糧見今束手以待是連前歲修
銀三萬兩并借用未補應給未支銀一萬七
千九百六十四兩八錢二分共該銀七萬四
千一百九十二兩八錢二分洗鍋待爨不可
時刻緩者而帑如懸磬將何以支所據司道
議將輕齎二升米銀歸復河道江南雇船停

徵米六升內再復二升一節誠非得已但臣等反覆思惟蘇松常鎮并杭嘉湖等處正當欠糶之後民不聊生豈可復行加派隨查得輕齋扣留二升米銀原係河工支用之數萬歷四年該漕撫都御史吳桂芳奏留一年爲批濟草灣之用萬歷六年該漕撫都御史江一麟奏留二年爲補造缺船之用臣等今日河工較之前項支費尤爲緊要伏望

皇上俯念運道至重

敕下該部准將輕齋二升米銀聽留河工支用三年
之後修築少閑仍以一升米銀解赴戶部餉
邊餘米一升准作河上歲修銀兩度幾歲修
不廢新工可興而河道安流歲漕無阻矣臣
等復又查得前項銀兩業已盡數解部必須
守候明年新運方可徵解相去尚遠難救燃
眉合無恭候

命下客臣等先於漕庫或淮安府庫借支別項銀兩
應用俟輕齋米銀解到之日照數補還則工

可刻期而告竣自早矣謹題請

旨奉

聖旨該部知道

戶部覆前疏

題爲查議河工緊急工費以免臨期匱乏事該總理河道右都御史潘季馴漕運都御史舒應龍各題同前事俱奉

聖旨該部知道欽此欽遵通抄到部送司案呈到部看得河道都御史潘季馴漕運都御史舒應

龍會題近該都給事中常居敬題奉

欽依築砌寶應土隄邵伯石隄共該工料銀二萬六千二百二十八兩未議動支何項錢糧要將輕齋二升米銀留用三年之後仍以一升米銀解部餉邊一升米銀准作河上歲修應用一節臣等查得輕齋二升米銀原備修河之費嗣因通惠河成改議解部濟邊今總理督臣潘季馴等議留築砌寶應邵伯湖隄是以正項留充正用况係緊要工程相應依擬覆

請恭候

命下本部移咨河道都御史潘季馴漕運都御史舒
應龍查將淮庫別項銀兩先借支二萬六千
二百二十八兩趲此秋冬水涸作速興工築
砌俟新運輕齎二升米銀解到不必拘定年
限照數補完餘銀仍行解部濟邊以後凡遇
有應修工程不妨照數再行奏留如無工程
卽以濟邊隨時通融不必各分其半以致臨
時支用不敷又煩費

請本部仍咨工部知會伏乞

聖裁奉

聖旨是

申明修守事宜疏

臣潘季馴謹

題爲申明修守事宜以圖永賴事伏念臣負譴餘
生甘心草莽謬蒙我

皇上曲垂矜貸復

賜甄收

高厚洪恩實均罔極受事四月夙夜靡寧且當修防
已弛之後復值河水暴漲之時東支西吾旣
竭心力諷諭荒度益信歲修之工不可緩也
敬陳覲縷恭候

聖明裁察臣竊惟治河之法別無奇謀秘計全在東
水歸漕歸漕非他卽先賢孟軻所謂水由地
中行而宋臣朱熹釋之曰地中兩崖間也東
水之法亦無奇謀秘計惟在堅築隄防隄防
非他卽禹貢所謂九澤旣陂四海會同而先

儒蔡沈釋之曰陂障也九州之澤已有陂障而無決潰四海之水無不會同而各有所歸也故隄固則水不泛濫而自然歸漕歸漕則水不上溢而自然下刷沙之所以滌渠之所以深河之所以導而入海皆相因而至矣然則固隄非防河之第一義乎而歲修之工舍固隄其何以乎臣於萬歷六年三月內祇承聖命總理河漕急趨淮徐視之黃決崔鎮而北淮決高堰而東而淮決高寶之水洛洞無涯漚爲

巨浸觀御史陳堂疏中所謂東橫西決散爲
洪流自徐邳以下至淮之南北不啻千里流
離漂沒莫可勝數居無尺椽食無半穗上阻
運道下墊民生而比時兩河情狀蓋可想矣
臣卽首擬合淮黃二流以復其本來之性築
遙縷二隄以防其潰決之虞具疏上

請謬荷

溫綸刻期興工十月告竣年逾八載並無隻艦漂流
粒米狼籍而昔日流遺之民仰戴我

皇上生成之恩咸歸故土比屋而居矣不意爲日旣
久人情遂弛掌印管河官視兩隄爲贅旒矣
歲剝月蝕殘缺頗多臣於六月初二日受事
卽申飭各該司道嚴督掌印管河等官分投
幫築晝夜修防寢食不寧者逾三月矣然立
法易而守法難守法於一時易而守法於長
久難臣於萬歷七年告竣之後將善後事宜

種種陳

請而臺省諸臣亦相繼題奉

俞命矣而近年以來行者無幾失今不爲申飭數年
之後又當何如哉故敢以修守事宜摘其喫
緊最關河防者條列于後伏望

敕下該部再加詳議如果臣言有裨

俯賜允行

特降嚴旨容臣刪削簡明榜諭分發司道并各該掌
印管河官置之座右庶幾常加省閱按時修
舉而可免疎玩之虞矣謹題請

旨

計開

一久任部臣以精練習臣竊謂天下之事皆可以揣摩測度而得之而惟治河一事非身親經歷足遍而目擊之則文移調度之間終屬影響故以大禹之智必十有三年而後成功蓋其諏諮荒度非假以歲月之久不得也何也水性有順逆河情有分合地勢有夷險隄形有高卑某處迎溜作何捲築以當其衝某處

掃灣作何幫護以防其汕至於分派官
夫皆有定額置辦器具各有攸宜儲蓄
物料栽插柳株一切瑣屑事宜種種皆
須料理總理衙門聒然一身控制于數
千里之間豈能一一身親爲之哉所恃
者分司與該道而已而該道不免有錢
穀刑獄兵戎之事撫按倚辦甚殷豈能
專心河務故總河之所恃以幹濟者分
司官爲多也但部臣初至地方未知原

經首尾歲月稍久頭緒頗知而轉擢之
報又至矣臣於萬曆八年具疏題

請久任奉有

成命而數年之間卒未有能行之者又何怪乎河工
之作輟也伏望

救下該部再加查議如遇中南兩河郎中員缺卽於

工部主事查有曾經分司河上及歷俸

未及三年者遴選推補查照舊規新舊

交代以河上事體轉相傳告代後克脩

職業任內並無疎虞容其歷俸九年方
爲破格遷擢則練習久而河防自熟區
畫當而河患可弭矣臣又查得見任南
河郎中羅用敬中河郎中沈修才識敏
練勤恪自將臣受事以來歷試諸艱輒
有成驗但俸資俱有六年轉擢之期將
至伏望比照原任中河郎中陳瑛事例
俟其九年考滿方與優處實於河道大
有裨益伏乞

聖裁

一責成長令以一事權夫州之有守縣之
有令卽家之有長也家務繁瑣不得不
分任於子弟或司耕作或司出納或司
交際雖各有其人而鳩工庀材備物致
用未有不取裁于家長而能成者臣嘗
以責成掌印官爲

聖朝高勸工給事中尹瑾兼管河道御史姜璧皆先後
具

題奉有

明旨矣官更更換若罔聞知臣頃於閱視之時見河水將發急若燃眉問其物料則曰某所官承買未至也問其夫則曰某處調用未補也問其時日非一月卽兩月也問之掌印官則曰不知也如此而寧有不愴誤者哉臣伏願自今伊始調度夫役備辦物料則責之掌印官趨事赴工董率巡守則責之管河官如有踈虞掌印

與管河官同罪至於郡之有守關係尤重瑣屑之事固難責成而提綱挈領區裁督察使守令有所受成者郡守之責矣伏乞

聖裁

一禁調官夫以期專工臣惟治河有定議而防河無止工工之不可止者乃所以成其議之一定而不可撓也何也治河之道惟有揀偏補弊之法必無一勞永

逸之事也不然則禹之治水可稱萬世
永賴矣何不數百年至商之祖乙而都
圯於河蕩析離居遂有盤庚之遷也蓋
禹法不守而河防久弛也故管河之官
必以河爲責而他務俱所未遑防河之
夫必以河爲事而諸工有所不逮朝于
斯暮于斯飲食起居必于斯功以久積
業以專成如此而猶有傾圯頽敗之患
者臣所未解也近該工科都給事中常

居敬將管河官查照清江造船廠官事
例凡係管河官專屬河道部司年終考
覈分別賢否徑呈督撫咨部施行不許
別謀差委題奉

聖旨近年管河佐貳等官多有營求差委妨廢職務
不行用心防守的總理衙門務遵敕諭拏問重
治不許姑息其餘依擬行欽此人心或知警畏
而於夫一節未經申明臣

請自今伊始凡遇差委管河大小官員及調用各項

夫役必須申呈總理衙門批允方許委
調如有抗違容臣指名叅究庶幾人無
事而工可責成矣伏乞

聖裁

一預定工料以便工作志有之防河如防
虜虜至而後爲治兵繕甲之計則必爲
虜所乘河漲而後爲鳩工聚材之計則
必爲河所乘此一定之理也臣

請于秋防告竣之後至十月中旬各該司道即便會

行各掌印管河官沿隄踏勘分爲三等以逼臨河濱當衝最急者爲第一等或改築或加幫或添築馬頭埽應委何官管理用夫若干應辦何項物料若干用銀若干次險者爲第二等又次者爲第三等官夫物料遞加減殺造冊開報司道覆核停當定限十一月初旬類報總理衙門批允查照分撥應辦物料卽行各掌印官支領歲修銀兩如數買辦定

限正月半以前報完隨卽興工定限四
月初旬告竣每歲著爲成規違誤定行
叅治度事以預立功以早成而無臨渴
掘井之患矣伏乞

聖裁

一立法增築以固隄防臣竊惟天下之事
不日益則日損而夫人之情不日檢則
日弛故自古帝王立法歲有成月有要
日有考未有不如此而能成久安長治

之業者也淮徐之民十年以來所以得免魚鱉之患而運道不致梗阻者恃有遙隄也先該給事中尹瑾慮恐歲久坍塌題

請每歲行令管河官率領守隄官夫務將各遙隄定限加高五寸加厚五寸年終司道官躬親覈驗開報河漕衙門造冊奏

聞每三年遣官一員前去閱視分別敘錄叅究等因工部覆奉

聖旨隄工歲修當視其低薄處隨宜加築豈得定以五寸爲限河漕當事諸臣能嚴督地方官着實經理視國如家何事不成亦不必數數差官閱視反滋多事其餘依擬行欽此仰見我

皇上體念河臣欲其事權歸一旦便責成也三年差官閱視委爲煩瑣不敢瀆陳矣至於加幫一節向因漫無稽考未嘗有分寸幫補雨水之霖瀉車馬之蹂躪如歸仁象山磨臍溝等處剝蝕過半矣臣伏觀

大明會典內開各處河隄每歲加高一尺加厚一尺
年終管河官具數奏

聞是

祖宗成法炳若日星大小河臣所宜世世守之者也
但河夫屢經裁減爲數不多欲其加幫
高厚各一尺力有未逮臣又查得隄身
兩傍率多蔓草盤結足堪遮護若欲加
土必須去草反爲不美臣見行司道官
將各隄坍塌卑薄者以原隄丈尺爲準

先行加幫取平至明年或可竣事臣

請自十八年爲始每歲司道官督令管河官率領夫役務覓真淤老土加高五寸不許夾雜浮沙苟且塞責再查護隄之法無如栽柳爲最而栽柳陸法無如卧柳爲佳蓋取其枝從根起扶蘇茂密足抵狂瀾也每隄一丈栽柳十二株每夫一名栽隄三丈柳樟以徑二寸爲則離隄以三尺爲準隄內栽完方及隄外如有枯死隨

時補種年終管河官呈報各該司道要
見本隄原高若干今加五寸共高若干
栽過柳株若干司道官躬親驗覈開報
總理衙門覆覈無異造冊奉

聞其不合數及不如式者指名叅究庶幾事有成規
而人知法守矣伏乞

聖裁

添設隄官以免遙制臣竊惟當官之事
兼攝爲難而以最卑之官攝最遠之事

爲尤難臣於萬歷七年建復高堰之隄以捍橫流於淮郡之東荆築柳浦灣之隄以遏狂瀾於淮郡之北十餘年間利賴於二隄者良不淺矣弟因比時亢旱之禁方嚴不敢多求添設故止

請高堰大使一員兼攝柳浦灣一帶隄務但查高堰之隄增築已幾百里而柳浦灣之隄起自清江浦以至高嶺戴百戶營延袤一百三十餘里伏秋之時顧此失彼一大

使豈能日奔走於二百里之間耶縱委
義民等官不過虛應故事豈肯在隄防
守前歲范家口之決實由此也臣

請添設柳浦灣大使一員任劄本隄要害去處自清

江浦起至戴百戶營一帶遙隄付之管
理應用夫役卽於高堰八百名數內裒
出三百再於南河隄淺夫內裒出二百
共夫五百與之其高堰大使專管本隄
各令晝夜巡邏遇汕卽補度地有專轄

而功可責成矣臣已行司道會議通詳
未報乞

敕工部轉咨漕撫都御史及咨都察院轉行巡按巡
鹽御史再加查議如果相應添設覆

請施行不勝幸甚伏乞

聖裁

一加幫真土以保護隄臣查得淮水發自
河南桐栢山挾七十二溪之水經鳳泗
東入于海然至泗州而龜山橫截河中

卽

基運山圖中所云灣如牛角勢樣非凡者是也下沙

一轉廻瀾西顧此於風氣實爲完美然

伏秋之時不免湧漲亦由此也臣讀宋

臣歐陽修先春亭記其畧有云景佑三

年泗守張侯問民之所素病而治其尤

暴者曰暴莫大于淮明年春作城之外

隄因其舊而廣之高三十二尺土寶石

堅捍暴備災可久而不壞又云泗天下

之水會也又云先時歲大水州幾溺張
侯夏守是州築隄以禦之今所謂因其
舊者是也夫曰尤暴者莫大于淮則知
淮之爲暴於泗舊矣曰隄高三十三尺
則知水之高矣先後州守惟以築隄爲
事則知禦淮之策舍隄之外無策矣今
查泗州護城隄高不及宋三之一然幸
當水一面甃石可恃但石內土隄皆係
浮沙一遇霖雨輒至坍塌損土隄一圯石

將安附不可不慮也臣於六月間躬往
閱視卽行潁州兵備道及該州知州浦
朝柱令其覓取真土另加堅築弟木隄
丈數頗多工費不少錢糧難處延久未
報臣請

敕下工部咨行撫按衙門多方計處覆

請施行庶護隄可恃而州民獲安矣再查

基運山去州一十餘里地勢高峻嘉靖十四年間該
前任總理河道都御史劉天和令匠役

王良等量得地形迥高二丈三尺一寸
則又與州不同東麓石隄見在查修臣
故未及之也伏乞

聖裁

一接築舊隄以防淤淺臣竊惟清口乃黃
淮交會之所運道必經之處稍有淺阻
便非利涉但欲其通利須令全淮之水
盡由此出則力能敵黃不爲沙墊往歲
高堰潰決淮從東行清口遂爲平陸高

堰旣築獨慮清河縣對岸王家口等處
淮水從此決出則清口之力微矣臣於
萬歷八年行郎中佘毅中卽於本處築
隄一道以防其溢數年之間清口利涉
實賴于此不意鳳泗商販船隻又於本
隄之東盜挖一渠取便往來歲久成河
已濶九十餘丈淮水盡由此出清口不
免沙淤臣查得此處係清河對面地方
該縣知縣出入之間一覽在目何致任

其盜決汪洋北注而若罔聞知且不以報也其秦越肥瘠亦甚矣除臣見在查理及行司道官候淮水消落接築長隄一道務期堅久可恃外臣

請隄成之後專責清河縣知縣管理每歲派定官夫時加幫補如遇水發率同地方人等晝夜巡邏以防盜決儻有疎虞卽將掌印官叅治蓋此隄卽在縣治之前較之他所不同而掌印官常川在縣較之管河

官尚有他處奔走者又不同也伏乞

聖裁奉

聖旨工部知道

工部覆前疏

題爲申明修守事宜以圖永賴事該總理河道右
都御史潘季馴題前事等因奉

聖旨工部知道欽此欽遵抄出到部送司案查萬歷
七年七月內該巡按直隸監察御史姜璧題
爲河工將竣敷陳未議懇乞

聖明俯賜采擇以保治安事內條議嚴責成等四事
要將河工專責府州縣掌印官督同管河官
管理等因八年四月內該工科右給事中尹
瑾題爲河工告成敷陳善後事宜以圖永利
事內條議重久任等七事緣由俱經本部覆
奉

欽依備行總理河漕及山東河南各撫按衙門欽遵
訖今該前因似應具題案呈到部看得黃河
自古號稱難治我

國家又以黃河爲運道其治之更有難者萬歷六年黃決崔鎮淮決高堰運道阻絕上厯

宵旰之憂該河臣潘季馴創築遙縷二隄合黃淮二流遂使八年之間轉漕數千萬石隻艦粒米悉達

京師功成之日詳陳善後事宜其要歸于修隄束水使之歸漕其法甚備乃日久人玩迄于去年黃河再溢幾至不支則隄漸圯而歲修之法漸廢也季馴荷蒙

召用再履茲任乃舉舊法而重新之又擇其中喫緊最關河防者列爲八款疏請

嚴旨特加申飭蓋思保前功于不毀杜後患于將來不圖旦夕苟且之安而爲

國家久遠之計通應依擬恭候

命下本部移咨吏部及總理河道鳳陽山東河南保定各巡撫衙門并咨都察院轉行各該巡按巡鹽巡漕御史仍劄各管河管泉郎中主事督行各該司道府州縣一體遵行仍聽總河

衙門將題

准事理刊刻簡明榜諭分發各該官員置之座右常
加省閱按時修舉庶法守常存而河防永賴
也

計開

一久任部臣以精練習

前件看得河工最巨治河最難其司道
各官非久于其任精于其業鮮克有
成者今河臣潘季馴灼知其故申議

久任之法特以中南兩河郎中爲請
而又舉見任郎中羅用敬沈修賢能
令歷任九年方行優擢蓋兩河之地
甚要則倚辦甚殷且見任郎中旣稱
得人是誠不可數易者合無悉如所
議今後二河郎中員缺

敕下吏部卽于工部主事查有曾經分司河上及歷
俸稍淺者遴選推補俟後查果職業
克修容令歷俸九年方爲破格遷擢

其南河郎中羅用敬中河郎中沈修
俸資已及六年相應比照陳瑛事例
俟其九年考滿方與優處如有異績
卽于京堂缺內推用蓋必有超遷然
後可以行久任此又法之相須者也
伏候

聖裁

一責成長令以二事權

前件看得萬歷八年該總河潘季馴與

科道諸臣先後具題將河防事宜責成州縣守令已經奉有

明旨乃數年以來亦未見舉行則以積習久而賞罰不信也不知趨事赴工雖管河佐貳之責而催辦調度則州縣守令之事苛責佐貳而緩于守令宜事功之不集也今總河潘季馴申明前議要將守令與佐貳凡有河道踈虞一體治罪而終復歸重于郡守深得提綱挈

領之意相應依擬凡河上工程不起
則坐佐貳錢糧夫役不備則坐守令
至于郡守有總理一郡之責倘河道
疎虞亦當權其失事之重輕察其平
日治河之勤惰而殿最行焉則賞罰
必信上下相維而人知激勸矣伏候

聖裁

一禁調官夫以期專工

前件看得防河如防虜沿邊將士不得

擅離信地沿河官夫豈容擅調別差
止緣管河各官避難趨易營求差委
以致河工作輟先該科臣常拈敬議
題奉有

嚴旨洞燭其弊人心已知警惕矣惟夫役一節未經
申明往往有見其空閑調撥別用者
不思河之塞決靡常夫之差遣無定
萬一誤事所損更多今後合照河臣
所議凡河上官員夫役非經申呈總

理衙門批允不得輕委一官妄調
夫以致疎虞違者叅

奏處治伏候

聖裁

一 預定工料以便工作

前件看得治水之法全在治隄治隄之

法全在歲修若物料不備是無米而

炊粥也若修防不豫是臨渴而掘井

也大約黃河泛漲常在伏秋然至伏

秋而始爲修防之計卽無及矣今議
欲于秋防竣後至十月中旬卽委司
道督同各掌印管河官沿河踏勘分
別三等而物料夫匠亦以次減殺其
動支錢糧選委員役通限十一月內
計議停當類報總河衙門批允正月
內辦完物料隨卽興工四月初工程
告竣每年著爲定規後期者叅處深
得先事預防之意相應依擬舉行仍

令將每年踏看計料與興工月日備
咨本部查考伏候

聖裁

一立法增築以固隄防

前件看得淮徐之間河流咫尺而其民
免于昏墊者以遙隄一線爲之捍隔
耳自有隄以來年復一年風雨剝蝕
車馬蹂躪日就卑薄勢所必至者先
該給事中尹瑾題

請加築高厚各五寸節奉

聖旨隄工歲修當視其低薄處隨宜加築豈得定以五寸爲限欽此臣竊思之限以尺寸者每年修守之常不限以尺寸者一時補偏之法若低薄而止加五寸則必無成功若歲修而亦欲隨宜又漫無稽考二者原當並行而不可偏廢今該河臣潘季馴復爲題

請合無查照所議自十八年爲始每歲修隄高厚俱

以五寸爲限遇有低薄處所卽便隨
宜加築務令與老隄相等不許夾雜
浮沙荷且塞責年終各司道將修築
過隄岸親行查覈尺寸類報總河衙
門覆覈造冊奏

聞有不如式者指名叅究至于栽柳護隄之法纖悉
曲當俱應如擬伏候

聖裁

一添設隄官以免遙制

前件看得高堰柳浦灣二隄綿亘二百餘里止以一大使往來兼攝勢卑地遠顧此失彼恐致疎虞今議要將原

設大使專管高堰而柳浦灣一帶自清江浦起至戴百戶營止另設大使一員專管應用夫役卽于高堰八百名數內裒出三百名及南河隄淺夫內裒出三百名共出五百名與之晝夜防守遇汕卽補河臣之議已當似

應免行彼處撫按覆查移咨吏部徑
自添設庶官有專責而隄防可固伏
候

聖裁

一加幫真土以保護隄

前件看得泗州雖爲水會而

基蓮山崑峙其北地形高峻風氣完美且東麓石隄
見在查修似尚可無水患惟是州城
卑窪僅有石隄一帶捍禦暴淮而隄

內多係浮沙雨水淋漓輒至坍塌土隄一圯石將安附可不爲之寒心邪河臣潘季馴躬親閱視題議幫築真土以固石隄委宜亟舉但其一應錢糧夫役與夫派委官員等項俱未有成議目前項工程尤於保障地方爲切合無吝行淮揚撫按會同總河衙門作速計處停當具題前來以憑覆

請施行伏候

接築舊隄以防淤淺

前件看得清口乃淮黃交會而淮黃原自不敵然清口所以不至壅淤者以全淮皆從此出其勢足以敵黃也若分之則必致壅淤先年淮決高堰而清口遂成平陸可鑒矣今王家口隄被商販盜決淮流之勢已分將來清口沙淤運道阻塞患必由之此隄在

清河縣對岸而該縣任其盜決罪將
誰誘今議欲行司道官候淮水消落
接築長隄隄成之後專責清河知縣
管理無事派夫修築有事責令看守
稍有疎虞卽行叅治庶幾責任旣專
而隄防可固相應依擬伏候

聖裁奉

聖旨河道每歲修防先年題有定規乃各該官員不
行着實遵守曠職誤事這所議俱依擬行如有

仍前怠玩的總河官指名叅奏重治

議守輔郡長隄疏

臣潘季馴謹

題爲議守輔郡長隄以防水患以保民生事臣竊
惟大名府爲輔郡要地關係匪輕去歲黃河
決入長垣東明地方滄沒田廬漂溺人畜上
廩

宸衷特差工科都給事中常居敬會同撫按諸臣培
築先年長隄一道兩縣之民方有更生之樂

臣受事之後卽行大名兵備兼管河道副使
侯堯封備查水決緣由及自後修防事宜去
後隨據回稱大名府所屬開州清豐南樂滑
縣並無河道元城大名魏縣內黃濬縣境內
止有漳衛二河如遇淤淺隨卽挑濬並未設
有管河官員去歲黃河泛漲從荆隆口衝決
大社隄滄沒長東二縣近蒙

題加該府通判李敷榮長垣縣縣丞張九二東明
縣縣丞徐衍兼管河防原無設有人夫如遇

雨水淋衝卽撥鄰近火夫修補歲修錢糧止
有每年額徵蒿草銀三百三十六兩一錢九
分三釐並無別項銀兩及將善後事宜開報
到臣臣以未經目擊不敢妄議隨於九月初
七日起程前往長東二縣踏勘行至板廠地
方有長隄一道卽係工科都給事中常居敬
與同撫按諸臣去歲所督築者也東至山東
曹縣白茅集西至河南封邱縣新豐村共長
一百三十里隄外卽有淘北河一道相傳卽

黃河故道也去歲之水委由荆隆口決入挾
淘北河衝決本隄之大社口致有昏墊之患
荆隆口雖決而本隄堅固則亦豈至兩邑之
沮洳哉是荆隆口隄實爲此隄之藩籬而此
隄實長東二邑之民所恃以爲命者也但荆
隆口隄係河南開封府所屬二邑豈能兼制
所可守者惟此長隄耳然守隄之法不外于
官夫之專設物料之預備而今皆無之是與
無隄同矣謹將該道所議善後事宜逐一斟

酌列欵上

請伏望

敕下該部再加查議如果臣言可採覆

請施行庶隄防可固而水患可弭矣謹題請

旨

計開

一議管河官駐劄以便修防臣查得大名府原有管河通判一員駐劄本隄之杜勝集後因河道安流革去管河通判而

以本隄俱屬長垣縣管理業已視此隄
爲贅旒矣今議巡捕通判兼管河防亦
無不可但該府去隄幾三百里伏秋之
時呼吸變態本官豈能遙制臣

請每歲自五月初一日起至九月盡止本官仍宜移
駐杜勝集本集原設有管河衙門行今
長東二縣再加修葺以便棲止督同兩
縣掌印管河等官往來巡視晝夜隄防
其本隄原有大岡杜勝各巡檢司亦聽

本官分委哨瞭度防守有人而災沴可免矣伏乞

聖裁

一議夫役以便工作臣惟守隄之有夫卽守城之有兵兵以禦寇夫以禦河必不可缺者也長隄雖築未經設有一夫則平時之修葺臨事之隄防誰與爲役且夏秋正當農忙之時起倩鄉夫怨咨必起甚非長民之道而有夫則有舖蓋以

便棲息也查得長垣縣該隄九十七里
每五里建舖一座該舖一十九座每舖
設舖老一名夫九名共應設夫老一百
九十名東明縣該隄三十三里該舖七
座應設夫老共七十名平時則覓取老
土加幫高厚木至則捲築埽料隄防汕
刷初春之時則栽插卧柳以護隄址庶
工多事集而衝決可免矣伏乞

聖裁

議處錢糧以備工料臣查得瀕河郡縣俱有河道錢糧而大名府獨無者以久無河患不復議處也至如去歲河水突入茫無所措不免空帑藏而爲之甚非計之得者今查兩縣共該建鋪二十六座每座工料銀五兩二錢共該銀一百三十餘兩此非每歲額銀議於長東二縣自理紙贖銀內支建不必別議外其夫老二百六十名每名該給工食銀六

兩共該銀一千五百六十兩每年稍草
繩麻等項約費銀二百兩通共該銀一
千七百六十兩內除每歲徵收蒿草銀

三百三十六兩尚欠銀一千四百二十

四兩行據通判李敷榮長東二縣知縣
周嗣哲朱誥議稱並無別項錢糧合於
兩縣徵收本府夏秋存糧銀內動給其
物料銀兩有事年分方准銷筭如此則
工費有備而修防克濟矣伏乞

聖裁

一查復舊規以便分任臣惟分土分民各有專責長隄乃長東二縣分管之地後因革去管河通判遂將本隄盡屬長垣一當有事之時在長垣則民非所轄難於呼集在東明則隄非所轄難於調度事之掣肘莫有甚于此者臣

請查復舊規照地分管屬長垣者以修守責之長垣屬東明者以修守責之東明無事均享

其逸有事各任其勞庶事無推諉而工
可責成矣伏乞

聖裁

一 分別妍媸以便委任臣竊惟治河之官
全在得人苟非其人立至傾圮臣於閱
視之時將該府縣管河官備加諮訪及
面與確議河上事體看得通判李敷榮
年力旣當壯猷之時才識亦爲敏達之
質長垣縣縣丞張九二河上事體俱能

通曉且隄上工程皆係兩官首尾合無
行令久任俸滿之日加銜管事六年通
考任內果無河患破格超擢其東明縣
縣丞徐衍性雖醇實齒實衰頽問其隄
工東西莫辨但任淺無過似應送部調
用員缺乏行撫按衙門印於所轄州縣
佐貳官內擇其廉能年壯者或陞或調
就近銓補促令到任管事以爲來歲修
防之計庶分理得人而河防允賴矣伏

乞

聖裁奉

聖旨工部知道

工部覆前疏

題爲議守輔郡長隄以防水患以保民生事該總理河道右都御史潘季馴題前事奉

聖旨工部知道欽此欽遵抄出到部送司案查萬歷十五年十月內該巡撫保定右僉都御史張西銘題爲查築河防并議專任責成以永奠

民居事內題議築大社集隄并將大名府巡捕通判及長垣等縣佐貳加添兼管分管河防各緣由本年十二月內又該查勘督理河工工科都給事中常居敬題爲查議河防以圖永利事內題議修築長垣等縣大社等集隄岸決口深潭緣由俱經本部覆奉

欽依備行保定撫按轉行管河司道各官一體欽遵訖今該前因隨將議動大名府夏秋存留銀兩移咨戶部依議前來似應具題案呈到部

看得大名府爲

畿輔重地其屬縣長垣東明境內原有長隄一道捍禦黃河則兩縣之民所恃以爲命而亦張秋運道所倚以爲固者也去年河決大社口泮沒遠近爲居民運道之處上厯

宸衷特遣工科都給事中常居敬會同撫按諸臣修築前隄民困始蘇然隄之旣壞修築爲先隄之已完防守爲要若官夫不設物料不備雖有隄防何能永固所據總理河臣潘季馴將

善後事宜列欵上

請區畫曲當深于河防有裨內除分別妍媸以便委任一欵移咨吏部議覆外其議管河官駐劄以便修防等四事係隸本部職掌相應依擬覆

請恭候

命下本部備咨戶部總理河道保定巡撫衙門及咨都察院轉行直隸巡按御史督行大名道府縣官員一體遵奉施行

計開

一議管河官駐劄以便修防

前件看得大名府管河通判駐劄府城

距隄幾三百里黃河衝決呼吸變態

豈三百里之外所能遙制今議每歲

自五月初一日起至九月終止本官

移駐杜勝集督率東長兩縣掌印管

河官及大岡杜勝二巡檢司晝夜巡

守其駐劄處所卽將原設衙門修葺

尤爲省便相應依議伏候

聖裁

一議夫役以便工作

前件看得禦河必以隄守隄必以夫此事勢相須不可缺一者大名久無河患雖有故隄基址並未設有一夫及至伏秋水發輒起鄉夫修守甚屬未便今議長東兩縣各照地里遠近設夫以守隄設舖以處夫至若培土于

平時捲埽于水至栽柳于初春所以
用夫之法尤爲纖悉曲當相應依議
伏候

聖裁

一議處錢糧以備工料

前件看得舖舍夫老旣已議設隄守固
有備矣然修舖舍則費工料設夫老
則費工食而稍草繩麻皆應用物料
不可缺者今議舖舍二十六座聽長

東二縣自理贖銀支建其夫老工食
及稍草等項物料共該銀一千七百
六十兩除每年蒿草銀三百三十六
兩尚欠一千四百二十四兩于本府
夏秋存糧銀內動支前項物料銀兩
無事徵收貯庫有事方准支銷庶工
費旣備而出納亦明矣相應依議伏
候

一查復舊規以便分任

前件看得長隄在長垣縣界九十七里
在東明縣界三十三里舊規原係分
轄後因裁革管河通判遂將本隄盡
屬長垣地分不明易得推諉今議查
復舊規照地分管庶修守各有專責
而臨事不致推調相應依議伏候

聖裁奉

聖旨依議着實行

吏部覆前疏

題爲議守輔郡長隄以防水患以保民生事准工部咨該總理河道右都御史潘季馴題前事奉

聖旨工部知道欽此欽遵咨部送司案呈到部看得總理河道右都御史潘季馴條議欲將大名府通判李敷榮長垣縣縣丞張九二俱令久任及議將東明縣縣丞徐衍送部調用員缺卽於所轄州縣佐貳官內就近銓補各一節

除通判李敷榮縣丞張九二行令文選司停
其陞轉准留在任管理河工俟其久任果有
成效容臣等另行優叙外爲照河工重大必
須委任大小官員皆得其人方能濟事所據
東明縣管河縣丞徐衍雖係新任但旣稱尋
常豈足幹辦查有眞定府棗強縣縣丞鈕鎰
各院道所註考語有強健精敏之稱必稱管
河之任可以更調旣經河道都御史具題前
來相應酌議覆請恭候

命下將鈕鑑改調東明縣徐衍改調棗強縣各縣丞
本部各給文憑令其到任管事仍咨總理河
道及撫按衙門各遵照施行奉

聖旨是

恭誦 綸音疏

臣潘季馴謹

題爲恭誦

綸音不勝感奮敬陳治河鄙見伏候

宸斷事伏念臣自嘉靖四十四年至今謬承總河之

命者肆矣向來治河之法惟是率由舊章非兩河之
故道不敢尋非已試之成規不敢蹈每自恨
其智識凡近器局拘攣無能炫奇更新以報
涓埃之萬一也茲沐我

皇上非常之恩尤當有非常之報故自入境以來延
袤千餘里內周諮荒度足遍而目及之矣而
卒無可以他圖者然猶謂河南爲黃河上流
或可別求長計頃於九月初七日躬率管河
道副使陳九仞開封府知府王見賓同知吳

克勤歸德府知府陳禰通判陳思論及各該
州縣掌印管河等官北自考以至武陟南自
滎澤以至虞城又自河南至大名府所屬長
東二縣將黃沁二河延隄踏勘大禹所治故
道歲久湮沒已不可考有云自荆隆口經廣
大二府地方出北海者臣請縱使可復無論
移河南徐淮之患於北直隸諸府而二洪乾
涸運艘難浮不可也或云復賈魯河自滎澤
而達渦河者無論二洪乾涸運艘難浮而鳳

泗

祖陵重地一淮尚且不支况益之以黃乎不可也或
云分沁河合漳衛二水出臨清可殺水勢者
沁河之濁不減黃河小灘見苦淺澁增此一
河必至淤塞不可也檢括故牒諮詢父老始
信治河之法惟有修防必難穿鑿方擬備陳
覲縷恭候

聖裁頃於十月初五等日准吏工二部咨奉

聖旨朕聞黃河衝決爲患不常欲一觀渾河以知水

勢昨見河流洶湧因念黃河經行處所經理防禦倍宜加慎河道官員還行文與他都着用心任事務一勤永逸勿勞民傷財以爲故事自今推選委用務在得人吏工二部知道欽此欽遵
焚鹽聽誦不勝感服不勝悚惕仰見我

皇上留心國計加意民生因渾思黃有觸卽感知黃河之衝決不常卽思防禦之當慎因防禦之當慎卽思勞民傷財之當戒因勞傷之當戒卽思委用之在得人

宸翰龍章不數言而盡治河之道矣臣請以河情水性併防禦鄙見敬爲

皇上陳之夫黃河由崑崙歷關陝至河南而合渭沁

諸河至徐州而合泗沂諸水至清河縣而合
淮河並入于海其間小谿曲澗之水又有不
可勝言者固無怪其波濤洶湧伏秋勢若滔
天考之書傳自周定王五年河徙碻磳歷漢
唐宋元以至我

朝河決不知幾千百次矣誠有如

聖諭黃河衝決爲患不常者而自發源以至入海處
惟見其合不見其分曾無兩河並行而古今
治河者惟以塞決築隄成功稍事穿鑿非久
卽廢何也蓋黃河與清河迥異黃性悍而質
濁先臣張仲義云河水一石六斗泥以四斗
之水載六斗之泥非極湍悍汎溜不可分則
勢緩勢緩則沙停沙停則河飽河飽則水溢
水溢則隄決隄決則河爲平陸而民生之昏

墊

國計之梗阻皆由此矣有謂隄能阻水水高隄高
隄無窮已者蓋不知隄能束水歸漕水從下
刷則河深可容故河上有岸岸上始有隄平
時水不及岸隄若贅旒伏秋暴漲始有逾岸
而及隄址者水落復于漕非謂隄外卽水而
旋高旋增也昔禹導河入海而必先之以陂
九澤者陂非隄乎有謂水欲其洩決以洩水
安用築爲蓋不知濁流易壅洩於決則必壅
於河必無兩全者昔瓠子之決漢武親臨羣

臣負薪投馬沉璧方克有濟亦豈好爲艱難
之事以自取勞苦哉誠有見于此也故治河
之法惟有慎守河隄嚴防衝決而

聖諭經理防禦倍宜加慎之外更無他策矣舍此而
別興無益之工卽爲勞民舍此而別爲無益
之費卽爲傷財然總之在於得人而已臣自
六月至今日與司道諸臣丁寧告戒惟以修
防爲事今歲霖雨連綿河水暴漲者十餘次
仰仗我

皇上聖德所格百神效靈

聖意所鍾百僚用命兩河翕猶往來無阻臣亦度邊
藉以塞貴矣然循途守轍之事誠不自滿於
心直至河南閱視之後恥無他道可尋故益
信防禦之當慎矣除申明修守事宜已經具
題該部見在議覆其河南應修應改隄工應添應
更官員候管河道議呈至日另行題

請外伏望

敕下該部再加查議如果臣言不謬容臣申飭各該

大小官員謹遵

聖諭毋惑淆言一意修防毋怠職業如有沿襲故事
輕役大衆虛糜錢糧容臣指名叅究共輸忠
赤務保無虞臣由髮及膚自頂及踵皆我

皇上生成至恩才識所及殞身何辭必不敢有一毫
未盡之心纖芥未竭之力自干斧鉞之誅也
臣無任激切屏營之至緣係恭誦

聖旨不勝感奮敬陳治河鄙見伏候

宸斷事理謹題請

旨奉

聖旨工部知道

工部覆前疏

題爲恭誦

綸音不勝感奮敬陳治鄙見伏候

宸斷事該總理河道右都御史潘季馴題前事等因
奉

聖旨工部知道欽此欽遵抄出到部送司案查本年
九月內該總理河道右都御史潘季馴題爲

申明修守事宜以圖永賴事內條議久任部
臣禁調官夫等八事緣由已經本部覆奉

聖旨河道每歲修防先年題有定規乃各該官員不
行着實遵守曠職誤事這所議俱依擬行如有

仍前怠玩的總河官指名叅奏重治欽此備行

總理河道鳳陽保定河南山東撫按衙門轉
行管河司道及劄付管河管閘郎中主事等

官一體欽遵訖今該前因似應具題案呈到
部看得總理河道右都御史潘季馴題稱仰

承

綸音敬陳治河專在慎守隄防一節爲照

國家財賦仰給東南轉運必由黃河治河必賴隄防所從來久矣頃自隄防少懈以致黃河泛溢乃言者不知治隄卽所以治河始議復故道開支河合沁衛以殺水勢諸說不一則河防不專河防不專則河患不息然則一議論專修防正今日之要務也總理河道右都御史潘季馴久歷河防熟知水性且感

殊異之恩冀效非常之報徧履省直地方備詢今古
事宜乃題稱黃河之必不可分與隄防之必
不可廢言皆有據行河底績蓋惟閱歷多而
聞見真故持論定而利害審非但一時之謀
實爲經久之計相應如議題

請以仰荅

綸音於萬一恭候

命下容臣等備咨總理河道河南山東保定鳳陽各
巡撫及咨都察院轉行各該巡按巡漕巡鹽

御史并劄付管河管閘郎中主事督率各該
道府州縣官員務要恪遵經理防禦倍宜加
慎

聖諭及本部近日覆奉

欽依修守事宜如有作聰明亂舊章勞民傷財徒損
無益與創爲臆說及蹈襲陳言阻壞成規致
誤

國計者聽部科總河衙門重行叅究然臣等又有
說焉伏讀

聖諭自今推選委用務在得人蓋人存斯政舉而任法尤不如任人也竊惟季馴治河屢試輒效有臣如此亦旣得人矣伏願

皇上重其權久其任假之便宜而責以成效必能爲皇上紓南顧之憂建久長之策其所屬大小管河官員如有陞遷降調等項俱聽本官甄別議處移咨吏部施行則修守無不得人而河防益爲永固矣奉

聖旨是近年河道官員不行遵守修防事宜因循廢

馳致有疎虞却又紛紛建議意見雜出何裨實
事今後務遵明旨加謹防禦每年終總漕官將
所屬河道部司等官甄別具奏